

祝
子
罪
知
錄

祝子罪知錄卷六

吳

王世貞元美校

濟南 李攀龍于鱗閱

論釋上

曰陰陽造化之理、三綱五常之道、聖人備言已顯
然矣、惟變而不動之性、死而不滅之心、以理推之
不可知、欲詳言之則無證、必待佛書而後明、儒或
徵諸夫子之所未言而佛言之、於是驚疑惑亂、詆

祝子罪知錄

卷六

毀排斥終無證其理之所從出徒自蔽而已然詆
之爲寂滅者非佛說動而不變之理斥之以亂倫
者乃權迹流弊之末佛之徒聞之而不怒不辯者
知理在人心信者自悟不可誣也迹流於世久則
必弊孰爲吾累哉是心變而無動死而不滅斯理
昭如皎日安得而自蔽歟若識此心悟此理儒爲
真儒僧爲聖僧矣心昏理迷莫知所往本之旣失
諍論復何益哉今儒者或謂人死卽滅亦無輪迴
再生之理甚非聖人之意易曰精氣爲物游覓爲

變精、靈知也。氣、形氣也。二者合而爲生，魂卽精也，游往也；靈知去則形氣變，二者離而爲死，原其始則精與氣合而生，反其終則精與氣離而死。死而不滅，則有鬼神，故知鬼神之情狀。死生、鬼神之道理，若日月寒暑之往來，誰能自滅？同於艸木乎？或言人物但稟氣而生，不知精、魂爲靈知也。人之神曰魂，睡則爲夢，卽有知之心耳。或謂魂爲氣，氣非有知也。若視聽言動皆曰氣之所爲，必由心帥之以應事，是亦精與氣合而爲用也。豈可謂魄爲氣乎？

庸常人無修心養性之功、一隔生死、不復知有前
身之事、不足以爲證、故聖人不及詳言也、儒者志
在排佛、故作人死斷滅之說、以破生死輪迴之論、
不知反違周孔聖人之意、但比丘之法、以出俗離
倫、斷煩惱生死爲對治、凡夫貪着之病、此小乘權
教有沉空滯寂之偏、故復立大乘菩薩教以破斥
其非、何待儒者譏其寂滅耶、佛教自國王大臣、長
者居士、以至天龍鬼神、一切品類、佛皆隨類化身、
說一切善法、究竟皆至如來之地、非但出家一門

爲至也。又何待儒者譏其權迹、爲無父無君、以亂
倫哉。自漢以來、經書迭至、究其指歸、誠所謂窮心
性之原、入至善之地、非但文字而已。晦菴曰、佛有
觀心之說、夫心、人之所主乎身、一而不二、爲主而
不爲客、命物而不命於人、故以心觀物、則物之理
得、今復百物以反觀於心、則是心之外復有一心、
而能管乎此心也。又曰、佛之學、以心求心、以心使
心、如口齟口、如目見目、其機危而迫、其塗險而塞、
其理虛而其勢逆、其言雖若有相似、而其實不同。

解曰、心法萬法之徹、心源至理難知、觀心斯得、人由迷此心體、不知返求、外爲六塵所惑、內則沈掉二病、是以局感無知、偏僻異見、惟佛返觀此心、頓悟本性、成等正覺、故於世間無量百千法門、出世無量百千法門、莫不洞明廓徹、今儒尚不自識本心、豈能以心觀佛哉、所謂人之主乎身、一而不二者、卽今出入六根緣染之識神也、命物而不命於人者、卽取着六塵而妄生我相者也、以心觀佛、則物之理得者、卽周徧計度、似是而非、蓋不識自心

則其本已失、安能觀物明理哉、其所謂今復百物以返觀乎心者、如古德云、境無心外、境見境卽見心是也、其所謂則是此心之外復有一心、而能管乎此心者非也、二祖云、覓心了不可得、一心尚無、豈復有二哉、吾佛之徒本無如是之見也、又謂聖人之學、本心以窮理、順理以應物、此言得之、但儒者錯解其義、書曰、人心惟危、道心惟微、惟精惟一、允執厥中、此心學之源也、人心妄想也、由執着顛倒故危、道心天理也、非思慮之所能及、故微精者

不昧一者不雜由無思故不昧無爲故不雜乃欲盡其至誠固守此中道也中卽中庸之中在心而不在物在內而不在外子思所謂喜怒哀樂之未發是也子思但以情識未動卽是中義與吾佛一念無生之理相近儒者釋中曰不偏不倚無過不及乃已發中節之和也便違子思之意矣喜怒哀樂未發之時無有形相可見豈有偏倚過與不及之事乎及解允執厥中皆曰已發之中是儒者不知中之爲義而妄釋之也君子時中者言守此未

發之中、心常不妄動也、子曰、易、無思也、無爲也、寂
然不動、感而遂通天下之故者、亦中和之義也、由
無思無爲未發之中、精一固執、則寂然不動、故能
感物應機、而通變無窮矣、此可謂本心以窮理順
理以應物也、若未能造思慮未發之時、終不識心
之本體、如是之人、聞無思無爲寂然不動之說、則
茫然罔措、且不知聖人之道、何所謂中、不識聖人
之言、則曲爲之解、曰、聖人無心、則釋曰、無私心、曰
聖人無爲、則釋曰、無所作爲、是皆以有心有爲度

聖人也、且得罪於堯舜周孔矣、何謂佛哉、彼既不
知觀心之妙、徒欲以徧計之妄心、觀物以窮理、辟
如塵鏡未磨、擬求鑒物、未之有也、是不知此理在
內、惟務外求、故學解益多、去道益遠矣、惟佛觀心
之道、不住六塵、頓息思慮、了悟本性、名爲反觀、今
儒者未嘗用力於此、輒妄議之、謂以心求心、如口
齧口、目視目、其機危而迫、其塗險而塞、其理虛而
其勢逆、可謂迷之甚矣、楞嚴經云、吾見之時、人皆
見、吾之見、吾不見時、何不見、吾不見之地、以心求

心此語明矣、若思慮未息、生滅宛然、若見若聞、皆爲塵相、須是離聲離色、聞見真常、卽是見吾不見之處、真聞真見、全顯本心、辟如百鍊真金、何憂火試與、以心使心、佛本無如是說也、

又曰、或問晦翁曰、只爲佛從心上起工夫、其學雖不然、却有本、儒者只從言語文字上做、有如此事、只做一場說話過耳、所以輸與他、答曰、彼所謂心上工夫、本不是、却勝儒者多、

程子曰、釋氏之學、於敬以直內、則有之矣、義以方

外則未之有也、故滯固者入於枯槁、疎通者歸於恣肆、此佛教所以隘也、吾道則不然、率性而已、斯理也、聖人於易備言之、

又曰、佛有一箇覺之理、可敬以直內、無義以方外、其直內者、要之亦不是、晦翁曰、今說求放心、却似釋氏說入定一般、但到此便死了、吾輩却要此心主宰得定、賴此做事業、所以不同。○因說程子耳無聞目無見之說、答曰、決無此理、釋教云塵既不緣、根無所着、反流全一、六用不行、蓋他意謂六根

不與六塵相緣、則收捨六根之用、及復歸於本體、而使之不行、顧烏有此理、辯曰、教有內外不同、故造理有淺深之異、求之於內心、性是也、求之於外、學解是也、故心通則萬法俱融、着相則目前自昧、外求之失、斯爲甚矣、今儒學之弊、浮華者以詞章爲事、純實者亦不過以文義爲宗、視心學則皆罔然、宋儒知其病、又知吾心上工夫爲有本、是當敵本抑末、以斥其言語文字之非、可也、而復以心上工夫不是、何自爲矛盾歟、本旣不是、何謂却勝儒

者乎此其不能窮心學之理於佛道深感亂而不能取決也觀伊川之言亦然夫旣愍吾道爲有內無外矣果能以內爲本得本何憂于末哉繼之枯槁恣肆又愍吾教之溢是未見其大者矣旣曰佛有覺之理爲敬以直內復云要之亦不是是皆反覆自惑之言豈真知此理者哉若率性之說亦不出吾心工夫必取證于易易乃心上之妙理先儒不窮本心之體遂不明良知良能之所自出謂有氣而後有知乃推性命之源于氣指性爲氣中之

理以氣循理爲道、故隨事隨物以明理、不知天地人物形氣皆生于覺性之中、而吾之本心妙明已徧照在思慮未發之時、若有得于此、卽時中義也、失此不能少存于內、徒追求于事物之末、謂之義以方外、豈有是哉、取證于易者、易言至神至聖、皆指不可測不可知之地、故不疾而速、不行而至、又以無思無爲爲感通之本、則易所證固非外矣、中庸曰中者天下之大本、故存養于不覩不聞之間、以無聲無臭爲至、則率性之道果在外乎、昔者聖

人皆以內學爲本、而推其用於外、後儒務外、遂不知有心學之源、乃以學解爲事、惟宋河南之學、始言性理、然但知心之用、而不究心之體、遂不知養未發之中、又昧太極之理、在兩儀未判之先、或以物理爲性理、故本末體用、於是乎不明、而堯舜周孔之道微矣、又以孟子求放心、比釋氏入定者、非也、若小乘之定、固已灰滅、更無求放心之意、佛乘之定、卽動常寂、何用求放心耶、其謂到此便死了、則說法度人者、又復生耶、不知佛所謂定、只是妄

念不起而應機接物允合其宜、儒者莫知此境、輒妄議之、又解反流全一、爲收拾六根之用、反復歸於本體、而使之不行、非也、若人不緣六塵、無所染着、反觀自心、明明不昧、寂寂常知、名曰圓照、卽了悟之地、非學解能到、悟則謂之內、解則謂之外、此內教外教所以不同也、儒者專用力於外、凡知解所不能及者、不復窮究、故不知允執厥中之道、天理流行之處、皆在思慮不起、物欲淨盡之時、踐履雖專、終不入聖人之域矣、蓋因疑佛氏之迹爲無

父無君遂不究盡其說使孔聖之道不明乃毀佛之過也

又曰釋氏之說若欲窮其源而去取之則其說和能窮固已化爲佛矣只且于迹上考之其設教如是其正果如何固難爲取其心不取其迹有是心則有是迹

晦翁曰伊川所謂只消就迹上斷他便了他既逃其父母雖說得如何道理也使不得如此足以斷之矣解曰今人欲以文字學解著述經書以窮佛

理不過增益知解終不能入法性之海程朱涉獵
佛書不究其指乃以其迹斷之其不信宜矣程朱
既往今之學者惑焉乃爲之解釋迦逃父母捨王
位踰城出家毀形壞服以名教論之以爲不忠不
孝無父無君是大不然也且輪王七寶之榮天帝
五欲之富泰來運合賞閱暫時報盡沉淪悲哀永
久此有漏之因暫處人天心生貪着惡業便起不
久當墮惡道如來佛眼所照見諸衆生輪迴六趣
長劫受苦於是發大慈悲做諸方便降胎入相成

道上救君父、下濟眷屬、以及一切衆生、出離生死、苦海、俱登菩薩彼岸、其爲功德、廣大難量、豈可執其方便權迹、妄生誹謗者哉、今以譬喻更明此義、如一長者、財富止有一子、鍾愛而長者依海而住、船舶甚多、他日欲適他國、遂以巨舟載其眷屬、泛海、檣柁損壞、將見沉溺、其子甚智、察知斯事、又知父別有船、設以告父、請往取船、知必不許、乃不告父母、夜半逾出、駕小船疾行至彼、旣得大船、天明、父聞子逝、驚求不得、方擬行舟、風濤大作、其子駕

彼大舟而至、急扶父母、得以全歸、設若此子先作
思惟、我若逃逝、使父憂惱、是爲不可、當全忠孝、義
同溺死、爲此至德、與私逃取船救父、孰爲優劣、儒
者因疑其迹、不究其道、所以爲義者、不過甘同溺
死而已、豈不哀哉、先儒不信生死輪迴之說、於佛
出世之理、重有惑焉、不知世間常道、有出世之道
具焉、所以爲大忠大孝者、非但服勞奉養而已、
又曰、晦翁曰、韓退之接引僧徒、要他歸儒、不過文
暢靈師、惠師之徒、皆破賴底僧、及晚年見大顛、說

得濶大勝妙、自然不得不服、人多要出脫退之也、
不消得、恐亦有此理也、

又年某年十五六時、嘗畱心於此、一日在劉病翁
所、會一僧與語、其僧只相應和了、也不說是不是、
却與劉說、某也理會得箇昭昭靈靈底禪、某遂疑
此僧更有妙處、遂去扣問、見他說得煞好、及去赴
試、便用他意思胡說、試官被某說動了、遂得舉、後
見李先生與他說、李先生只說不是、某却疑李先生
生理會此未得、再三質問、只教看聖賢言語、某遂

將禪來倚閣、意中謂禪亦自在、且將聖人書讀、讀來讀去、一日覺聖賢言語漸漸有味、回看釋氏之說、漸漸破綻、罅漏百出、辯曰、佛之法門、東流者四、曰講、曰禪、曰律、曰秘密、講禪繼述尤多、又爲名士大夫之所宗尚、雖入門不同、而證理則一、若無思入講、不能通貫諸經知解、叅禪無由超悟至理、故習講者、觀諸經論文義、深思通解、解終趨行、乃絕思、惟能所兩忘、名爲入位、叅禪者、異於是、惟單提直指、不尚多聞、但悟一心、萬行斯備、若大顛實與

退之說禪退之豈能卽悟至理亦不過以名相開諭之而已此晦翁所謂濶大勝妙正名相邊事也退之若果悟禪則後來見識必當與前不同其答張藉等書豈有自爲晦匿之辭旣疑似若此則胸中所見可知矣况朱晦翁所遇之僧又非大顛之比必少有學解妄稱證得尚不識禪爲何事烏足爲晦翁師問哉禪悟門也悟則轉凡成聖如斬一握絲一斬一切斷豈有疑二進退反復生訪者乎且晦翁弱冠之年未曾親見智人而杜撰參禪不

出情識境界、若急與辯斥、剪其枝蔓、尚恨其遲、此僧不能如此、便當歛手而退、却將昭昭靈靈引之、此則偏務醒醒、認賊爲子、及其再來叩問、添得知解轉多、故云說得煞好、晦翁由是錯解禪意、反將其說爲應舉之資、久之破綻、豈不宜哉、晦翁如此保認、是將禪爲知解邊事、及見李延平、遂有倚閣自在二說、顯然生滅流注、議論橫生、遂用心以著述爲事、其分別事理字義、最爲詳盡、至于性理未達道體之妙、于是旁思熟慮、任情起見、則去聖人

之道爲有間矣。其論禪謂曹洞宗說得細故法嗣中絕。臨濟說麤枝大葉。禪故久遠。此強辯也。按洞山密傳寶鏡三昧。又勘辯諸方言句。有三種滲漏。其所立宗旨。漸涉知解。而義路不絕。正是麤處。以晦翁所見。頗彷彿其影像。是故謂之細。臨濟門風峻拔。超情離見。非上上根人。一聞千悟者。無能窺其蹊徑。正是細處。晦翁于此罔然。故謂之麤。

又曰中庸序曰。彌近理而大亂真。晦翁云。釋氏之學。與吾儒甚相似處。如有物先天地。無形本寂寥。

能爲萬象主、不逐四時彫、又撲落非他物、縱橫不
是塵、山河及大地、全露法王身、又若人識得心、大
地無寸土、看他是甚麼樣見識、今區區小儒、怎生
出得他手、宜其爲他揮下也、

又曰、此是法眼禪師下、一派宗旨如此、今之禪家、
皆破其說、以爲有理路、落窠臼、礙正知見、今多是
麻三斤、乾屎橛之說、謂之不落窠臼、不墮理路、妙
喜之說如此、又有畚轉不如此說時、

問禪家說無頭底當話是如何、曰、他說分明處、却

不是只內中一句黑如漆者便是緊要處於此曉
得時便都曉得辯曰舉知解門則以爲近理舉證
悟門莫辨其當機不入悟階何由與辯如人徧身
是病不在痛癢所在則難治也今欲治其不治之
病姑卽其說論之如近理亂真者譬莠之類禾必
當辯其非禾其所謂甚相似者必似是而非者也
今舉而讚之竟未有以非之則不應以近理目之
不能辯其非真則不應以亂真斥之夫知其識見
之高愍小儒爲其揮下則當詳辨其近理非理之

處亂真非真之事、使學者下然知其繆妄、何恨真
僞之不分也歟、若如此泛說以關之、何以服天下
後世乎、此段倡誦、乃知解中意、可以聞解信入、非
契證門也、故云、吾理路落窠臼、若契證門、如禪者
問答、機鋒相接、離言顯智、離智顯體、爲人解粘去
縛、其間間不容髮、少有失機、名爲話墮、若圓知相
對、機如轉丸、鍼芥相投、眼如皎日、豈可謂黑如漆
乎、儒者罔知其意、隨語求解、豈有曉得之理、禪門
文字、性離思惟、路絕詮表、意不在言、惟機所適、儒

者於此罔措、乃云又有翻轉、不如說時尤可笑、
又曰晦翁曰、上蔡云、佛所謂性、正聖人所謂心、佛
所謂心、正聖人所謂意、心只是該得這理、佛氏元
不曾認得這理一節、便認知覺運動做性、如視聽
言貌思、聖人則各有其理、佛氏只認得能視能聽
能思能動底、便是性、不管橫來豎來、他都認做性、
最怕人說這理字、都要除掉了、

問釋氏作用是性、曰、便只是這性、他說得也是、孟
子曰、形色天性也、惟聖人然後可以踐形、便是此

性如彼說視聽言底是誰便是這箇故其言曰在
眼曰見在耳曰聞在鼻嗅香在舌談論識者知是
佛性不識喚作精覓他也說得好所以直指人心
見性成佛他只要你見得言下便悟做處便徹見
得無不是此性也說存心養性養得來光明寂照
無所不徧無所不通又實際理地不受一塵佛事
門中不捨一法他本自說得是所養者也是只是
差處便在這裏吾儒所養者是仁義禮智他所養
者只是視聽言動儒者則全體中自有許多道理

各自有分別、有是非、降衷秉彝、無不各具此理。他只是見得箇渾崙底物事、無分別、無是非、橫也是、豎也是、直底曲底皆是、非禮而視也是、此性以禮而視也是、此性少間用處都差、所以七顛八倒、無有是處。吾儒只是一箇真實道理、他亦云惟此一事、實餘二、卽非真。他只說得一邊、只認得人心、無所謂道心。所爭處只在此。吾儒說不周、無不徧。他亦說不周、無不徧。然人倫上不能周徧、更說甚周徧。解曰：大覺無私、乃徧知于法界。塵情有着、徒妄。

起於塵勞、佛與衆生、本同一體、但因迷悟、見有殊塗、佛性只在眼耳鼻口之間、妙用不離見聞知覺之際、直是一塵不受、一法不捨、頓見本來面目、今以生滅垢心、起輪迴見、翳目生花、又求實花生處、徒勞分別、妄費精神者也、真性現時、若擊石火、急着精彩、認得依然不是、此處正是迷悟關子、得則速證真常、失則速入塗炭、只如視聽言動、皆真性發現、若無心體會、則森羅萬象、一鑒昭然、此按指發光、所謂一念不生全體現也、若說是性、卽是認

着影子、使毫不繫念、瞥耳情生、業相宛然、依前迷倒、此舉心塵起、所謂六根纔動、被雲遮也、到此着力不得、晦翁所謂差處、正是大疑惑也、仁義禮知、皆是就人事立名、乃事物軌則、豈可謂本性便是此理、本性乃一念未起、事物未形、卽是明覺之體、若常覺不昧、不爲六塵所惑、養成聖胎、佛門號曰如來、儒者稱曰神聖、只是本無私欲、純一之天理也、以此應事接物、乃可不思而得、不勉而中、無爲而成、所以仁者見之謂之仁、智者見之謂之智、是

無心于仁智而自合仁智者也。此天理者未見仁智之名發之于外。乃有仁智之用。故本性卽是天理。天理卽是明覺。非在外也。若以五常之理爲性。不可言百姓日用而不知。百姓庸常之人也。情發必中節。豈能日用五常之理耶。若以本心明覺爲性。百姓曷常不覺哉。然覺性在視聽言動日用之間而不自覺。常被塵勞所惑。自昧其明。故曰知道者鮮矣。由是言之。周孔以上聖人亦皆以本覺爲性也。其所謂全體之中自有許多道理。非也。蓋全

體之中無一物一事可見、豈有許多道耶、若謂發用處有許多道理、有分別是非、則可安得以用爲體乎、其要在明心體、彼不知心體之妙、說爲渾崙物事、是不見明鏡止水之中、森羅萬象、無壞無雜、不生分別之心、而妍醜了然、安得有非禮顛倒之事歟、六塵不緣、則私欲淨盡、安得只有人心歟、夫周徧者佛言一、卽一切、一切卽一理、自徧周、非因循得、儒者務用心觀物以求徧、豈能周徧乎、吾佛于七情未發之時、已空其惡、故惡自不生、儒者

于惡念已形之後、擬欲斷之、其用力故不同矣、若
有所得、則賢者之學、宋儒有焉、聖人之道、未之或
知也、其差者、以有爲之心爲體、故自見得有許多
道理、又各自有分別、有是非、只此三有、存之於心、
我相既立、而卷枝錯節、膠固莫辭、不知天下事物
之理、徧通不窮、欲以斯須之明、造次之聰、畧加忖
度、若有得焉、卽自矜曰、吾分別詳矣、是非辯矣、人
或異已、則曰、我明識道理、必如是爲當也、幸一二
之偶中、則眼空四海、若王介甫之徒是也、此謂之

我相我相立而公心亡矣凡作此者或見用於世其不敗者鮮矣良由認事理爲性理求外學以資于內倒持本末源委失真其流之弊以作爲爲事有以起禍亂之階可不慎歟

又曰學者于釋氏當如淫聲美色以遠之不然則駸駸然入其中矣或問朱子曰今士大夫晚年都被禪家引去者何故答曰是他高似你你平生讀許多書記誦文章所藉以取功名利祿之計者到這裏都靠不得所以被他降下他底且省力誰不

悅而趨之、王介甫平生學力、說許多道理、臨了捨宅爲寺、又云、只緣他打併得心下清潔、所以本朝李文靖、王文正、楊文公、劉元城、呂申公、都是甚麼人也、都去學他、

問龜山答陳了翁論華嚴大旨、不知諸人何爲好之之篤、曰、只是見不透、故覺他那箇好、以今觀之、也是好、也是動得人、

問龜山言道非禮則蕩而無止、禮非道則梏於器數儀章之末、則道乃是虛無恍惚、無所準則之物、

此類甚多、如此類則似禪、曰、固是其徒蕭子莊李
西山陳默堂皆說禪、龜山沒西山嘗有佛經疏追
薦之、此等皆不可曉、

又云游定夫晚年亦學禪、

又云此箇道理、纔理會到深處、又易得似禪、須是
理會到深處、又却與禪不相似、學者只是不曾到
深處、定走入禪去、譬如人在淮河上立、不知不覺
走入番界去、如程門高第游氏、分明是投番了、雖
上蔡龜山、也只是淮河上游游漾漾立地、終是看

他未破時時去他那下探須也須疑看他有箇好處

尹和靖日課金剛經拜觀音菩薩解曰理學君子既造聖賢之域得盡心養性之道豈詖辭淫邪見僻行之所能惑所能動哉爲所能動者必非詖淫邪僻也且聰明才智出倫之士早讀聖賢書積德立身功名節義昭昭出人之表綱常之道弗虧但嫌其有學佛之差是果悖道之如是耶非也乃惑者之妄議耳如李沆王旦楊億呂公著德義行業

爲宋名臣、彼固不耻于學佛、亦未嘗得罪於名教、固可輕議其非歟、劉安世、陳了翁、文章節義冠世、豈不悅周程之道、然好佛之篤、未有以加之也、其處患難、臨死生不測之禍、恬然莫能動其心而害之者、或嘔血而亡、豈非學佛之驗歟、此數君子未嘗因好佛而虧行業、傷彝倫也、何爲佛氏之爲害尤甚哉、至若程門高弟、未有過于游楊尹、謝而皆有學佛之癖、豈信道不篤、晚年遂改節如是耶、二程道南之語、亦誤許之耶、然則其父師拳拳之心、

惟恐學者流入其中、如四子者、肯遽忘之耶、嗚呼、
是深有得于周程之意、燭理之精、遂知禪學之妙、
不覺趨入其中矣、朱子論佛氏由義學變入于禪、
卽解終趨行之道也、程門高弟、造理之深、固不能
遏其入禪矣、然考之五燈、未有深許之者、蓋信解
而未契悟耳、其所著述、未出儒氏之說、謂之曰類
禪、則禪學直如是乎、禪固非彼所及、然因其有得
于此、遂于儒書之理、益加詳焉、後學耻其歸佛、故
矯揉其說、凡聖人之書、有近于佛者、皆故違經旨、

別立異說、惟恐其類禪、理學之差、皆出於此、其誤世豈淺淺哉、

又曰晦翁曰、近理亂真處、程子自私二字、得其要領、明道答橫渠書云、人患在自私用智、此大凡人
之任私意耳、下文云、豁然、而大公、物來而順應、便
是不自私、不用智也、

又云佛氏自私昧道、今以惡外物之心、求照無物
之地、猶反鑑索照也、亦是絕外物而求定之意、自
私而用智、如世人一等嗜慾、豈能以有爲爲應

迹若廓然太公物來順應便都不如此上不淪空
寂下不累於物欲

問明德而不能推之以新民可謂是自私有學佛
者王天順與陸子靜辯論云我這佛和耳目鼻口
皆不愛要天下人各成佛豈得是自私先生笑云
待度天下人各成佛却是教他各各自私陸子靜
從初亦學佛嘗言佛差處是義理之間某應云此
猶是第二着只他根本處便不是當初釋迦爲太
子時出遊見生老病死苦遂厭惡之入雪山修行

從上一念、便一切作空看、惟恐割業之不猛、屏除之不盡、吾儒却不然、蓋見得無一物、不是此理、無一理不達于物、佛說萬理俱空、儒說萬物俱實、從此一差、方有公私義利之不同、今學佛者云、識心見性、不知識是何心、見是何性、辯曰、私莫私于物欲、公莫公于至理、私欲勝、則其見昧、至理徹、則其見明、况所謂道乎、道者、古今聖賢之所共由、非自私自利之地也、若謂佛以自私自利爲道、不可也、謂佛用智、尤不可也、人之所愛、莫甚于利、佛則捨

愛矣、所利莫甚於生、佛則捨生矣、自私自利、必歸
于已、佛無我相、利將誰歸、今以佛厭生、老病死而
修出苦之道、謂之自思私爲利、則佛者私不厭苦而自
甘沉溺、乃謂之大公合義乎、夫用智必陷人於險、
佛以方便之智、濟度一切衆生、反以爲陷之歟、佛
道周徧十方、於一切法平等無二、自不以爲功、普
濟六道衆生、猶如一子、自不以爲利、智入三世十
方、徧知一切衆生若干種心、隨根與法、增能受護
而無失時、雖知衆生界不可盡、而不暫起一念捨

衆生意此名佛智、豈世間智術之事乎、彼所謂以惡外物之心、求照無物之地者、如厭動求靜、避喧趨寂、諸經屢有彈斥之文、不待辯也、然有形之物、可以鑒喻、反鑒則不能照物、心無形相、無有背面、反求則息妄歸真、內外洞徹、非反鑒之比也、若謂自私用智、如世人一等嗜慾者、吾佛以慈悲喜捨、勇于向道、尚有過于世人嗜慾也、孔子亦曰、吾未見好德如好色者是也、古德云、道念若同情念、成佛多時、如來若不勇猛求道、安能普濟群生哉、今

儒者以有爲爲應迹、又能廓然大公、物來順應、斷無是理、設以周徧計度之心、志在有爲、必先有我相、我相旣立、自私則甚焉、於是塵勞紛動、惡覺堯起、至於應迹、豈能廓然利害關心、有如重翳、何謂大公、事物之來、機如逐電、造次顛沛、反覆多矣、安能順應、此由自私之爲患也、故私莫私于有我、我相執着、則不能虛心以容物、豈能公于天下乎、又言吾儒見得無一物、不是此理、無一理可違于物、不知本末之論也、理尊無對、一而不二者也、隨物

之差殊不同而各當其可其言無一物不是此理者是也其言無一理可違于物非也理本無名隨事立名故理之當長者必違于短當短者必違于長當厚必違薄當薄必違厚如理不當用此物則違物以從理豈可謂無一理可違于物乎理無名相徹底惟空故能徧萬物而各得其宜若有實體卽有名相不可與物作則可謂理乎言識心見性者可識者是塵可見者是境非心性也如眼能見物不能自見若有可見決定非眼雖不自見不

是無眼、心性亦然。先儒盡心養性，只在已發處有養。但見得心性發用之處，其于思慮未起，聖人允執之中，則昧然而莫識。其去孔子子思爲有間矣。指佛氏爲自私，豈知佛理者哉？佛以染淨和合爲心，純淨無染爲性。非真悟者，莫知心性之體可輕議與。至若利義利之分，非識心見性者，固莫及也。又曰：或問晦翁曰：佛與老莊不同乎？曰：老莊滅義理，人倫未盡；至佛則人倫絕盡。至禪則義理滅盡。辯曰：謂佛棄父母出家爲絕滅人倫，非是實事。乃

祝子罪知錄

卷六

二十九

三六

應化之迹、實未嘗離親側也。至如隨類化身、普度萬品、非但出家一事而已。又謂禪則義理滅盡、非也。禪、悟門也。人由六塵而迷、不捨六塵而悟。義理窠臼者、法塵也。以生心動念、卽乖法體。故絕解以趨行、行起之時、無量妙義、亘古今常流、且不窮也。況絕滅乎。

子罪知錄卷六 終

曾孫男世廉謹輯

祝子罪知錄卷七

吳 祝允明希哲纂

王世貞元美校

濟南 李攀龍于鱗閱

論釋下

曰濂溪嘗謂一部法華經祇是一箇艮卦可了時
佛印寓鸞溪公謁見與講道問曰天命之謂性率
性之謂道禪門何得謂無心是道師云疑則別參
公曰參則不無畢竟以何爲道師曰滿目青山一

任看公有省一日忽見牕前草生乃曰與自家意思一般以偈呈師曰昔本不迷今不悟云云師和云云由是愈師作青松社主嬾白蓮故事

二程始以易學爲諸儒倡嘗曰看一部華嚴經不如看艮卦楊子安喜叅禪不肯明道每攻其徒曰六經藥也無病安所用適明道自涪陵過襄陽子安問曰易從甚處起明道以扇柄畫地曰從這裏起子安曰這一畫從甚處起明道無語子安便起伊川嘗致書於靈源清禪師云云師答書云云仍

示偈云、佛說從來沒世情、是非邪正要分明、口頭說得千千尺、心下須教寸寸行、

朱子曰、圓覺經云、四大分散、今者妄身、當在何處、是竊列子骨骸返其根、精神入其門、我當何存語、楞巖經前面呪、是他總、後會說道理、是附會圓覺經前數疊、稍可看、後面一段、淡如一段、後二十五輪、與夫誓語可笑、

楞巖經是房融說得如此巧、佛當初也不如此說、如四十二章經、最初傳來中國的文字、其說却自

平實、

有學者讀法華經、晦翁問曰、此經要在何處、答曰、在是法、非思量分別之所能及、一句、晦翁曰、吾儒正要思量分別、所以不同也、

晦翁看金剛經曰、釋迦快說走轆話、解曰、或者未識經之宗趣、以生滅垢心、妄議如來境界、而生毀訾、如取螢火燒金剛山、一何損耶、如來稱法界性、說華嚴經、及諸神妙智用、徹諸法性相、理事盡修、行心數門戶、窮理盡性者也、曰、不如看箇艮卦、是

何言歟。蓋曰：良其背，不獲其身；止之止也，行其庭，不見其人，動之止也。不過十波羅蜜門，禪定一門而已。豈能該一部之義乎？若以佛理觀之，背者居心之頂表，無思之地；止于無思，則無我相，是不獲其身也。庭者，應事接物之處，行者舉動應用之時，謂動而常寂，起唯法起，則無人相。衆人相壽者，相是不見其人也。若如是解說，與般若經意有少分相似，亦未見其本心之理也。必曰：但止心不動，如此則心境自然明見，由定可以發慧也。列子所謂

精神入其門云云者卽原始反終之義明生死之說而已若圓覺經言四大各有所歸卽今妄身了不可得乃卽色明空不待滅也與列子人死卽滅是滅色方空理正相反林氏曰佛生西方豈來剽竊詆之太過是不公矣又圓覺十二菩薩欲明圓覺之旨故展轉設疑與佛論辯皆相因互見該攝上中下三根因其惑有輕重故其言有淺深適當其機而已豈可以淡言也哉二十五輪單復圖修隨其根習順利故有道場修證儀式至弘誓流通

諸經法則如是、何必見笑。若楞嚴經、則徵心辯性、顯密雙融、選擇圓通、應根立教、略陳階地、廣說禪那、明諸陰消、條分異見、與圓頓諸經、互有顯發、豈房融能巧說乎。其結集之人、以灌頂密因、集爲一部、說有前後、不在一時、非附會也。四十二章、乃佛法初來、未宜深旨、譯者姑從平淺之文、使易曉耳。豈佛語但如是乎。法華歎佛智甚深、非言思所及、其爲宗要、但顯佛乘、而世人欲以思量分別求道、文辭知解而已、非心學也。心學則誠而已、至誠則

無思而得、純一不雜、金剛經乃破相離塵、心無所住、而佛語略無留滯、圓變無窮、豈走輓之言乎、佛語如王寶印、非有異文、潛心讀之、必有得焉、切勿輕議也、

又曰、橫渠曰、佛氏妄意天性、而不知範圍天用、反以六根之微、用緣天地、明不能盡、則誣天地、日月爲幻妄、蔽其用于一身之小、溺其志于虛空之大、此所以語大語小、流遁失中、其過于大也、塵芥六合、其蔽于小也、夢幻人世、謂之窮理可乎、不知窮

理而謂之盡性可乎、塵本

謂天地有窮也、夢

幻人世明其不能究所從也

又曰浮圖明鬼謂有識之死受生循環遂厭苦求
免以人生爲妄見可謂知人乎天人一物輒生取
舍孔孟所謂天彼所謂道或者指游魂爲變爲輪
迴未之思也大學當先知天德知天德則知聖人
知鬼神今浮圖劇談要歸必謂生死流轉非得道
者不免謂之悟道可乎自其說熾傳中國儒者未
窺聖學門牆已爲引取淪胥其間指爲大道乃其

俗達之天下、致善惡愚智、男女臧獲、人人著信、使
英才間氣生、則溺耳目、怙習之事、長則師世、儒崇
尚之言、遂冥然被驅、因謂聖人可不修而至、大道
可不學而知、故未識聖人心、已謂不必求其迹、未
見君子志、已謂不必事其文、此人倫所以不察、庶
物所以不明、治所以忽、德所以亂、異言滿耳、上無
禮以防其僞、下無學以稽其弊、自古詖淫邪遁之
辭、翕然竝興、一出於佛氏之門者、千二百年、向非
獨立不懼、精一自信、有大過人之才、何以正立其

問與之較是非計得失哉、

晦翁曰、誑者是他只見得一邊、於那處都蔽塞了、是誑辭、知其所蔽、淫者說得周遮浩瀚、其書動輒數百卷、是陷於偏而不能返、是淫辭、知其所陷、邪者他見得偏了、於道不相貫屬、是邪辭、知其所離、遁者他已離於道而不通、君臣父子都已棄絕、見知不得、却言道之精妙、不在乎此、是遁辭、知其所窮、初只是誑、誑而後淫、淫而後邪、邪而後離、離而後遁、要知偏處只是虛其理、理是實理、他却虛了、

故于大本不立、辯曰、天性者、佛謂之本覺、卽一念未起、寂而常照之心也、儒門乃喜怒哀樂未發之中、無一毫私欲之累、純乎天德者也、二教之迹雖異、本性之理則同也、佛曰、諸本覺法、爲六度萬行、乃至圓滿佛果、儒亦從此天性發爲仁義禮智、以成聖人之道、佛則兼四聖六凡而治之、儒者但治人道而已、豈佛妄意天性、不知範圍天用歟、若人六根塵念不生、則理自徧周、明照法界、非六根能緣天地也、孔子亦曰、人生而靜、天之性也、感物而

動性之欲也。則亦以七情未發者爲性。感物而動者爲情。欲也以迷者言之。則自身與天地萬物皆無常妄幻也。以悟者言之。則是法住法位。世間常相住。皆一真之境也。豈蔽其用于一身之小。溺其志于虛空之大乎。語大語小。乃依正二報。情器二界。體自含容。固世智所不能知。非佛言流遁失中也。知大小無體。則攝入互容。而塵含六合。芥納須彌矣。知延促無時。三世不遷。則世界成壞。有如空花矣。此一心之體相也。以相卽體。則古今萬劫不

出刹那以體卽相則一毛孔中現十方界皆性分之常也所謂窮理者舉一卽明多理舉多不出一理非若今日格一物明日格一物以爲窮理也所謂盡性者自十住初心歷五位而入佛位乃無明盡而智慧圓也天地世界成住壞空循環無已以成壞言之則有窮以循環言之則無窮非明心性之源孰能究其所從哉言人死而鬼古有其說非佛始爲此言也孔子曰祭則鬼享之古祭宗廟皆是享已死之鬼也受生循環者聖人雖未顯言其

事以理則可見矣、人性雖曰明覺、因染六塵而起、妄見豈可謂人而無妄乎、然三界惟是一心、萬法隨識所變、豈分天人是一是二、而生取舍乎、佛亦未嘗指天曰道、此皆張子駕說也、精氣爲物、游魂爲變、故知鬼神之情狀、豈非人死爲鬼乎、聖人繫易以生死鬼神對說、正輪迴之義也、易言知幽明之故、幽則鬼神之道、明則天人之理、皆一而不異者也、論語答子路之問、言事人所以明乎事鬼、言知生所以明知死、死生神鬼亦一而不異者也、張

子不循聖經之旨、別爲無稽之言、欲破佛法、反自昧焉、又引天德破輪迴之說、尤爲迂遠、聖人與天合德者、至誠而已、言知聖人可也、言知鬼神則惑矣、鬼神乃幽靈之動物、有吉凶邪正之殊、非純一至誠者也、聖人但言至誠可以感神、至誠可以前知、至誠如神者、言至誠能前知吉凶、如神靈也、佛氏言悟道者明本心也、本心乃一念未知、無死生、可得知、此則曰了死生、非言得道免生死也、了生死者、不設於生死、亦不出於生死、不設不出、故能

化身萬類、說法度人、治世出世之道矣、儒門聖人、窮理盡性、原始反終、故知生死、則樂天知命、而生順死安、成治世之道矣、且人鬼二物、皆有形氣、以幽明異塗、各不相見、若反常爲怪、則人亦見鬼、鬼亦見人、三尺之童、亦能曉此、豈謂明理君子、惑反甚焉、謂佛法熾傳中國、而儒者之英才、間氣皆爭先崇尚、至于愚賤、莫不尊奉者、蓋佛與衆生、本同一體、但因迷悟、乃異其名、今同佛說、以心照心、泛而行之、卽時明了、其趨之也、何足怪歟、若明五位

階漸圓極佛果皆多劫積修非但儒者一生之修
豈不修而至乎六度萬行止觀熏習佛佛道同豈
不求其迹乎三乘四教問答論議祇陀讚頌盈卷
累牘豈不求其文乎在家出家戒儀不等治世典
章生產作業皆是實相豈人倫不察庶物不明乎
尊卑品類人物鳥獸華夷異俗語言異教佛皆徧
周隨機普應不壞彼相入我正法何謂治忽德亂
異言滿乎是皆不知佛理之妙遂疑爲異言也然
直指人心在其自證自肯非誘之使入何論僞與

弊哉又以佛言爲誑淫邪道者豈有是歟佛離斷
常顛倒異見具正徧知豈有邊見及蔽塞之處是
未嘗誑也其經書則文富義博而宗旨了然使人
雖終身讀誦而繹之無厭一句染神而千劫不朽
終爲解脫之因未嘗淫而陷也諸經宗趣性相互
融行解兼備如王寶印無有異文豈有不相貫屬
者乎豈可謂邪詳知其所離也教有權實不同故
有三車之喻而出家之迹事屬權門圓滿報身始
明實理其言先淺後深姑世間訓蒙之法豈可謂

遁辭有所窮哉、言道之精妙、不在君臣父子者、非佛氏之言也、如來具足萬善、豈忠孝之有缺耶、理之虛實、已見前篇、今或者執有爲之常見、耳目所不及者、不信別有境界、地里可考者、自流沙以東九千里、南北萬餘里、古今可考者、自堯舜至今三千七百餘年、自此之外、東海至西海、數十萬里、金輪王至淨飯王、數萬億年、更有遠遊之士、邁古之書、其所言者、便指爲異說、况佛說微塵數世界、微塵數劫乎、如人居環堵之內、不信天地之大、豈非

蔽乎、本心之理、不明、向外着物窮理、困於見聞之
筭、而終身莫出、豈非陷乎、聞佛道而不信、駕浮言
以誦之、豈非邪乎、既不能議其本、求其迹以排之、
豈非遁乎、一言論佛、卽具四者之差、又能獨立不
懼、精一自信、以較是非、計得失歟、

又曰、明道曰、楊墨之害、甚於申韓、佛老之害、甚於
楊墨。○佛氏之言、比之楊墨、尤爲近理、所以其害
尤甚、

晦菴曰、佛氏乘虛入中國、廣大自勝之說、幻妄寂

滅之論自齋戒變爲義學然只是盜襲莊子之意
說出這般道理及達磨入來又翻了許多窠臼說
出禪又高妙於義學以爲可以直超徑悟其言禍
福報應足以鉗制愚俗爲資足衣食之計遂使有
國有家者割田以贍之擇地以居之以相從陷于
無父無君之域而不自覺蓋道釋之教皆一再而
侵其本真有國家者雖隆重儒學而選舉之制學
校之法施設舉措之方既不出于言語文字之工
而又以道之要妙無越于釋老之中而崇重隆奉

反在于彼、至于二帝三王、述天理、順人心、治世教、民、惇典庸禮之大法、一切不復有行之者、論曰、三教聖人、其言雖不同、然皆足以開人心之天理、救世俗之澆漓、成帝王之治功也、昔孔子祖述堯舜之道、故能究心學之源、推性德之用、刪詩、定書、繫周易、而作春秋、以垂後世、曾子著大學、子思作中庸、而其言詳矣、自漢以來、法而宗之、雖未能盡行其說、而所以致治效也、亦不少矣、其弊也、漢末諸儒、嫉惡太甚、有黨錮之禍、唐末諸儒、交結權勢、有

朋黨之災、宋元豐諸儒作爲生事、乃成新法之患、亦莫不因之以亡國、然後世史臣論之、不過成是敗非而已、孰能究其源哉、使王介甫不爲元豐之政、則學者尊之、必不在周程之下矣、若揣其源、實心學不明之罪也、心學不明、以有爲爲盡性、不能養中以誠明之道、當時大儒不能斥其學術之差、但以執拘目之、執拘者、謂之我相、故有爲之心、莫不自我相起、至今儒者雖學程朱之道、我相甚焉、以周徧計度之、私臨事物紛動之際、堅存已見、莫

肯信人各以分別之心橫起是非之論上不懼神明之昭察下不畏民物之相違著書則妄解聖經處士則失機背理良由不知堯舜之道精一執中已而百姓自化垂衣拱手無爲而天下自平又不知古者帝王皆稟天爲教王者事天比臣事君不敢專也先儒釋天曰理釋鬼神曰氣則是無所主者矣雖釋帝曰主宰又不言實有神聖之靈則祭天卽是祭理享鬼神卽是享氣此見解豈能真超至敬耶又議佛氏不應以禍福戒人則小人爲非

謂無禍福可降、無所不至、是教之爲亂也。又議楊墨之害、甚於申韓、何不公之甚耶。楊墨學術雖偏、尚不失爲善人。申韓之術、刻深殘忍。商鞅、李斯行之、壞先王之法、制焚先王之詩書、反乎周孔之教、莫斯爲甚。至今猾吏效之、流毒未已。未聞楊墨如是之甚也。又以佛之言近理、爲害尤甚、則悖理者其害小、近理者其害大、更不知何說也。往往儒術乃以申韓輔之、亦不自覺其非矣。良由心學不明、故名世之士、文章記誦而已、淳謹者執古非今、昧

適時通變之道、狂肆者任術生事、爲亂之階、所以
述天理、順人心、爲治世教民之本、使二帝三王之
道、于是不行、若此其弊、豈佛老之說、能害之哉、云
云

又曰、晦翁曰、嘗見畫諸師人物、皆雄偉、宜其傑然
自立、氣貌如此、則富貴利達、聲色貨利、如何籠絡
得他住、他視之無足動其心者、論曰、佛教義理深
玄、造詣殊特、非上智不能入、故諸師氣貌出羣、則
才智可知矣、至如富貴利達、聲色貨利、雖古今豪

傑功業蓋世者、莫不被其籠絡、至死不悟、惟佛門
諸師中、有英雄之畧、具上智之資者多矣、其心豈
不知事業可以昭當時、德澤可以被四海、聲名可
以垂後世、富貴可以及子孫、而棄之若弊屣、畧不
少顧、其介如此、奈何信謖淫邪遁之辭、引惹繫縛
之深固、反有過于富貴利達哉、必不然矣、其生于
數百年之下、見其氣貌、不覺歎服、則亦當知其心
非自私爲利之徒、何敢毀之、若是其深也、聞其言、
旣知其意也、微見其貌、又知其志也、大然終却行

而莫入退則與諸後學深閉固拒若將滅之豈非
惑歟或曰先儒真信聖人之學躬踐而篤行之欲
比德于周公孔子未必惑吾佛之甚也亦不過欲
立其教恐中衰而不吾若又慮其徒或趨入佛門
而弗返姑爲障蔽而已非實不知也愚曰不然卽
若禪講諸門學者各有所當其行旣專遂不相下
故諍論亦多矣然皆足以利世化民而不妨礙使
儒道釋亦並行而不戾雖各以其道自尊終不爲
誹毀之言或兼學而互通之則心學豈不益明歟

必諍論而優劣之非世教之福也

已上皆論士榮原教論

又曰溫公嘗書心經贈僧題其後云退之排佛而

稱大顛外形骸云云由是觀之于佛不爲無得所

排者跡耳

出西山讀書記及鳴道集性學辨

又劉元城稱溫公曰

老先生深知佛法

出元城語錄

又曰晦菴惡佛以爲虛無寂滅云云孔子曰易無

思也無爲也寂然不動感而遂通天下之故非天

下之至神其孰能與于斯禮曰無爲而物成是天

道也子思子曰上天之載無聲無臭聖賢之旨初

無少異、

又曰晦菴托溫公言死者形既朽滅神亦飄散雖有剉燒春磨且無所施是則虛無寂滅至於空蕩無歸矣且如有人臥於武林夢居金陵與彼人飲食是時惟知有此飲食之身不知亦有幻身臥於武林也夢飲食者神識也亦名精魂也凡人思善思惡生死不絕者卽此神識也死者受苦剉燒春磨亦卽此神識也是時惟知有此受苦之身不知亦有幻身死于人間也幻身如房屋神識猶屋中

人人既出不顧房屋神識既出不顧幻身晦菴所言是惟見幻身生滅不知神識不消滅也猶知房屋傾頽不知屋中之人先出屋外渾無損也此不消滅之神識隨業受報出殼入殼或苦或樂也不知之者神識奔蕩茫然無歸神識尚爾况欲明佛性乎金滕曰武王有疾周公告太王王季文王以旦代其身予仁若考能多才多藝能事鬼神若據晦菴之言則周公代死形既朽滅神亦飄散雖有多才多藝亦無所存將何以事鬼神乎三王亦

將何以受周公之告乎禮記孔子曰人死曰鬼此
三代所不變也若謂形既朽滅神亦飄散將何以
爲鬼乎晦菴之說是則周孔之言非矣

又曰或問性理之說古書皆不言千五百年後獨
周子言之答曰否論者不知考耳性理之說東林
禪師授之濂溪東林以前各專已教未能融會至
涯師始以其詞意發明易中庸之旨非古無今有
也出瑩中錄併性學諸要公早留心禪學後叅靈源靈源曰
離却心意識而叅絕却聖凡路而學可也公被逼

責無所用心、晝夜呆坐而已、偶於燕寂間、脫然開悟、述偈云云、自此有省、

又曰程子謂聖賢以生死爲本分事云云、佛學爲怕死生、故只管說不已、殊不知世人識情繫縛、循環生死、莫之能已、佛說諸經、指而諭之、依然修行、悟明生死、豈是怕生死乎、世人只見幻身生死、不見佛性不生不死、不知生從何來、死從何去、設使欲知、亦無所措手、是以強說此言、修飾而已、大似不得飯喫、強言不饑也、孔子曰、未知生、焉知死、又曰、

原始反終、豈不言生死耶、

又曰近思錄、理學類編、北溪字義等書、皆不識佛、猜忌而已、世人以凡情測度佛聖境界、太空粟粒、何足辯之、豈不見晦菴臨訣困篤、自悔曰、到此時、節輪與黃面老子一着、自供款也、蓋欲遮掩心病、盡住攔住、後學不看佛書、故作詩云、誰哉繼三聖、爲我焚其書、恐學者多看佛書、則見其心病、故密設牆塹、令後學走不出、識不破也、

又曰晦菴謂形朽滅、神亦飄散、然則祭享是誰受、

享耶周孔之謂祭祀之道是虛設耶

又曰神亦飄散之說在于小學又言范文正公曰異日何以見祖宗于地下理學類編晦菴又曰死則氣散泯然無迹有托生者是偶然聚得不散又去湊着那生氣亦能再生然則何人羞見祖宗于地下乎何物湊着生氣而再生乎自相矛盾莫能解釋也如史記魏顆左傳彭生禮記人死曰鬼及鮑靚記并羊祐識環等事皆與其說違戾又如禮記太皞爲春帝勾芒爲神之類若神飄散泯然無

跡將以何爲四時之帝之神乎有問人死冤冤便散否晦菴曰固是散又問子孫祭祀却有感格如何答曰子孫是祖先之氣所以感格若然則嶽瀆山川社稷無祀等神旣非子孫皆無感格耶又姜源生稷簡狄生契伊尹空桑寶誌鴈巢是誰之氣以誰爲先祖耶

又曰宋人昧佛惟橫渠至晦菴數人耳唐宋諸禪師不分儒釋平等開導豈料朱子將我佛法作儒法用欲歸功于已轉身排佛嗚呼此機一失痛惜

無及

又曰國一以道學傳壽涯涯傳麻衣衣傳陳搏搏傳种放放傳穆修修傳李挺挺傳邵子修又以所傳太極圖授濂溪已而濂溪扣圖之深旨于東林禪師總爲委曲剖論濂溪廣總之語而爲太極圖說濂溪長于禪學工夫過于邵子

又曰濂溪初扣黃龍南禪師教外別傳之旨南諭濂其畧曰只消向你自家屋裏打點孔子謂朝聞道夕死可矣畢竟以何爲道夕死可耶顏子不改

其樂所樂者何事、但于此究竟久久自然有个契

合處

出附章氏家譜

濂一日扣佛印元師曰、畢竟以何爲

道、元曰、滿目青山、一任看、濂擬議、元笑而已、濂脫

然有省

出資鑑并佛印語錄後跋

濂聞總得涯與麻衣二師心

傳易學、窮神極性、乃扣之、總諭濂畧曰、佛性實際

理地、卽真實無妄、真而無妄、卽誠也、大哉乾元、萬

物資始、資此實理、乾道變化、各正性命、正此實理、

天地聖人之道、至誠而已、必要着一路實地工夫、

直至于一旦豁然悟入、不可只在言語上會

云

云

濂一日與張子厚等同詣東林論性總曰吾教中

多言性故曰性宗所謂真如性法性性卽理也有

理法界事法界理事交徹理外無事事必有理諸

子沉吟未決濂毅然出曰性體冲漠惟理而已何

疑耶橫渠曰東林性理之論惟我茂叔能之出弘益紀

聞濂問太極總曰易在先天無形有理蓋太極卽

易也無形之理卽無極也天地間只是一氣進退

而爲四時以一氣言之皆元之爲也劉時中所得東林親筆論

易之語又尹氏家塾及蘇李明筆記胡五峰叙通

語備并有程子深愛元包四德之語

書謂濂得太極圖於穆修、修得於种放、放得於陳

搏、此其學之一師也。明說太極圖非濂所作、搏之

學得於麻衣、麻衣得於壽涯禪師。

山性學指要濂并正易心法

問太極圖之所由、總曰、壽涯得國一之心、傳其來

遠矣、非言事物而言至理、當時建圖之意、據吾教

中依空立世界、以無爲萬有爲祖、以爲無因。

無即所依

之以有爲果。

有即二氣交運

以真爲體。

真即一真至理

以假爲用。

假即萬物化生

故云無極之真、妙合而凝。

云

濂復造佛

印、叙及悟由、印曰、吾多教人孔孟之大義、今公所

負可以起之、宜力行無滯、東林亦有諭、濂倡儒爲

道學之語、出松隱雜記濂諭學者曰、吾此妙心實得、故

廸于南老、發明于佛印、易道義理廓達之說、若不

得東林、開遮拂拭、斷不能表裏洞然、該貫弘博矣

出尹氏家塾并性學指要道學性理之始、實倡于涯師、而至于

總師、總以授周子、弘益紀聞陳忠肅公曰、道學之說、東

林授之濂溪、濂溪廣之、其言徧于佛書、瑩中錄并性學指要

劉潛夫詩云、濂溪學得自高僧、又云、始知周孔外

別自有英豪、出後村集

又曰程子以太極圖授之後山、後山曰：余觀周程推已教人之所以及，反觀孔孟以來，實未嘗有此寂默危坐、收工夫尋樂處，以爲斯文之窮究，信乎周程體道之源，固有所別流矣。

趙說之心學淵源後跋

明道

深味於華嚴合論，自謂有所心融意會，爲喜以其所由書于雲蓋寺。

雲蓋寺碑刻墨蹟

明道以亡母壽安縣

君忌辰，往西京長慶寺修冥福，躬與齋席，見衆僧入堂，周旋步武，威儀濟濟，一起一坐，竝準清規，伐

鼓擊鐘，內外整肅，歎曰：三代禮樂盡在是矣。

弘益紀聞

靈源清師答伊川書曰、妄承過聽、以知道者見期、
雖未一奉目擊之歡、聞公留心此道甚久、天下大
宗師、歷扣殆遍、猶以鄙人未見爲不足、頃聞先師
言公見處、今覽所作法要後序、深觀信入真實不
虛也、出靈源語錄 先師卽心已而伊川多入靈
源之室、嘉泰普燈錄云、程伊川、徐師川、朱世英、洪
駒父、咸問道于靈源、故伊川作文註書、多取佛祖
辭意、信源流之有從也、胡汲仲曰、孟子沒千五百
餘年、道潛統絕、周子出、然後潛者復光、絕者復續、

程氏二子得周子之傳、周子之傳出于北園竹林
寺壽涯禪師而爲首倡、程子四傳而得朱文公文
公復得張敬夫講究此道、方得脫然處、乃云前日
所聞竹林遺語未之契者、皆不我欺、元來此事與
禪學十分相似、學不知禪、不知學、互相排擊都不
曾劄著病處、亦可笑也。胡氏大歐陽玄曰、程子平
日愛讀佛書、但不及朱氏之博覽。歐陽伊川曰、明
道出入釋老幾十年、伊川所作東林論濂有一中
散爲萬事、未復合爲一理、及天理之性、人欲之私、

天地萬物本吾一體、元包四德、誠通誠復等辭、二

程傳其學、故伊川著書立言、皆本其意、或全用其

語、如易傳序、體用一源、顯微無間、

此二句出唐清涼國師華嚴經

疏、濂溪太極圖說、無極之真、妙合而凝、

此二句出華嚴經法

界觀無極而太極等語、全是東林口訣、周子通書、濂

洛集等皆根于此、周程取用佛法多此類也、

又曰晦菴深諱周程明露佛語、故云周子之學、莫

知其師傳之所自、又云周子之學、得之于天、且未

周子通書師友草云、至難得者、道德有于身而已、

矣求人至難得者有于身非師友則不可得也晦
菴之言悖于周子之語矣意在絕其所得之自殊
不知昧于天理愈令節病彰焉有若韓子見大顛
後所有敬佛之辭後人刪而去之晦菴校韓文尚
留韓子上大顛三書後人再刊又將此一併刪去
故知後人既服晦菴之藥執迷于排佛尤甚于晦
菴爭知晦菴設此關竅曲排之也故人不識其所
以然將謂是實從實而排之所謂一人傳虛萬人
傳實也嗟乎晦菴所設後人尚識不破也

又曰晦菴所用佛語若虛靈不昧

此句出唐譯大智度論併禪書

不可限量

出華嚴寶積大集等經

似是而非

出潭津集

大學補缺

全是禪語畧翻變之

始言一理中散為萬事末復合為一理

真實無妄真實之理有是理而後有是事天地之

理至實無妄聖人之心至實無妄

皆是東林口能授周子語意

知覺所知覺

楞嚴經等

千聖相傳心法脫然有悟處又

非見聞思慮之可及也物我一理固有之性心之

體用吾心正而天地之心亦正萬物之本原一心

之妙用活潑潑地徹頭徹尾做工夫到這裏咬菜

根無縫塔、三句語、劄着病處、一刀兩段、一棒一條

痕、一捆一掌血、

皆出禪書并諸經

註復卦、引楞嚴經語爲

澄據、云非惟年有變、月亦有之、

云云出周易附錄纂註

晦菴

註四書等、并諸製作、多用佛法、以佛經禪語、改頭

損面、翻變其語、而取其意、如是用者、遍于羣書、而

又諱之、是何心哉、

又曰、晦菴早從延平、久之、恨無發明、及詢長者、指

令禪學、乃徧謁禪老、與東萊南軒同問道于大慧、

出大慧年譜後

十八歲從劉屏山、屏山意其留心舉業、搜

其篋惟慧語錄耳

出尤煊所作大慧語錄序并拱辰集等書

嘗致書于

開善謙禪師曰喜向蒙大慧師開示狗子佛性話

頭未有悟入願授一言警所不逮謙答書曰把這

一念提撕狗子話不要商量勇猛直前一刀兩段

晦菴覽之有省

出資鑑拱辰集性理羣書

又有書啟國清寒山

子詩刻成幸早見寄

見寒山詩後

有問今士大夫都入

禪家去何也晦菴曰是他高似你你平生讀許多

書記誦文章所籍以取功名利祿之計者到這裏

都靠不得所以被他降下了王介甫平生學許多

道理臨了捨宅爲寺、本朝李文靖王文正劉元城
呂申公都是甚麼人也、都去入他禪學、佛經說六
根六識、四大十二緣生之論、皆極精妙、故前輩謂
孔子所不及也、四大卽是冤鬼、十二緣生出華嚴
合論、佛說本言盡知世間萬事、後却說出實際理
地、不變一塵、萬事門頭不捨一法、達磨盡翻窠臼
倡爲禪宗、親義學尤爲高妙、金剛經大意只在須
菩提問云何應住、云何降伏其心兩句上、故說不
應住、法生心、不應住色生心、云禪宗有云、有物

先天地無形本寂寥能爲萬象主不逐四時彫撲
落非他物縱橫不是塵山河及大地全露法王身
若人識得心大地無寸土看他是甚麼樣見識今
區區小儒怎生出得他手宜其爲他揮下也

朱子語錄

并易解歐陽玄
雜記性理羣書

又曰濂溪問性于東林答曰性卽理也東林以性
之瑣末應酬而已理之一言豈能盡性之道哉猶
曾子曰夫子之道忠恕而已矣忠恕之言豈能盡
夫子之道哉此亦應酬而已濂溪以性卽理之一

言取足于心授之程子後來晦菴倚恃其說乃以性卽理者爲千萬世說性之根基中庸曰天命之謂性率性之謂道晦菴注云性卽理也率循也以卽理之所言指之爲性循此卽理指之爲道晦菴以此所言釋副中庸之義也安得子思再生論此

道哉

以上皆景隆尚直編○按今儒生密傳朱子

朱素亦潛有修習其卒亦是坐亡門人恐人知見推仆之此二事前輩遞遞傳之亦謂有所據見而爲朱諱之又不可泯故口相付畀因記于此又如宋人雜紀事書載陳正叔每每携門人入寺講習則終其日茹素又記康節入寺必拜佛程乃否有問者亦不詳說其故如此類尚多今無暇一一檢

又曰天生東魯西竺二聖人化導蒸民雖設教不同使人福善一也東魯則曰存心養性西竺則曰明心見性究其實雖若稍殊世間之理其有出于一心之外者哉心者萬理之原大無不包小無不撮能克之則爲賢知反之則愚不肖矣覺之則爲四聖反之則六凡矣世但見修明禮樂刑政爲致治之具持守戒定慧爲入道之要一處世間一出世間有若冰炭晝夜之相反殊不知春夏之申而

萬彙榮、秋冬之屈而庶物藏、皆一元之氣運行氣
之外無他物也、達人大觀洞然八荒無藩籬之限、
無戶闔之封、不事形迹、而一趨于大同、小夫淺智、
肝膽自相吳越者、烏足以與于此哉、

宋廉

祝子罪知錄卷七

終

曾孫男世廉謹輯